

**UPA 2015/150: Uunga siunnersuut: Inatsisartunut Naalakkersuisunullu il.il. ilaasortat  
anigaasarsiaqartitaanerat il.il. pillugit Inatsisartut inatsisaata  
allanngortinneqarneranik Inatsisartut inatsisaat nr. xx, uu. qqqq 2015-imeersoq  
(Inatsisartunut ilaasortat il.il. sulinngiffeqarallarsinnaanerannut il.il. malittarisassanik  
Inatsisartut aalajangersaanerat)**

**pillugu**

**Inatsisinut Ataatsimiititaliap**

**ISUMALIUTISSIISSUTAA**

**siunnersuutip aappassaaneerneqarnerani saqqummiunneqartoq**

Suliarinninnermini Inatsisinut Ataatsimiititaliap ukuninnga inuttaqarpoq:

Inatsisartunut ilaasortaq Laura Tàunâjik, Siumut, Siulittaasoq  
Inatsisartunut ilaasortaq Justus Hansen, Demokraatit, Siulittaasup tullia  
Inatsisartunut ilaasortaq Ineqi Kielsen, Siumut  
Inatsisartunut ilaasortaq Aaja Chemnitz Larsen, Inuit Ataqatigiit  
Inatsisartunut ilaasortaq Iddimangiiu Bianco, Inuit Ataqatigiit

Inatsisartut ataatsimiinneranni matumani Inatsisartunut Naalakkersuisunullu il.il. ilaasortat anigaasarsiaqartitaanerat il.il. pillugit Inatsisartut inatsisaata allanngortinneqarneranik Inatsisartut inatsisissaattut siunnersuummik Inatsisartut Siulittaasoqarfiat saqqummiussivoq. Siunnersuut Suleriaatsimut Ataatsimiititaliamut tusarniaanertalerlugu Inatsisinut Ataatsimiititaliamut suliassanngortillugu innersuunneqarpoq.

Inatsisinut Ataatsimiititaliap Suleriaatsimut Ataatsimiititaliamut apeqqtai Suleriaatsimullu Ataatsimiititaliap taakkununga akissutai isumaliutissiissummut ilanngussaq 1-itut 2-tullu ilanngunneqarput. Tamatuma saniatigut allannguutissatut siunnersuut isumaliutissiissummut ilanngunneqarpoq.

**1. Inatsisissatut siunnersuut**

Anigaasarsiaqartitaanermut inatsimmi sulinngiffeqarallartarnermut malittarisassat pisariillisarneqarnissaat kiisalu sulinngiffeqarallartarnermut najuutinngikkallartarnermullu Inatsisartut suleriaasianni malittarisassanik erseqqinnerusunik aalajangersaanissap

Inatsisartunut suliakkiutigineqarnissaa inatsimmik allannguissamut siunnersuummik siunertaavoq.

Tamanna Inatsisinut Ataatsimiititaliamit taamatullu Suleriaatsimut Ataatsimiititaliamit siunertamut tulluartsutut nalilerneqarpoq.

Aningaasarsiaqartitaanermut inatsisimmi atuuttumi § 6-imut inatsisissamik piareersaateqarnermi pitsaanngitsumik oqaasertaliisimaneq Inatsisissatut siunnersuutip aamma iluarsiivigissavaa.

Suleriaatsimut Ataatsimiititaliaq Inatsisinulluunniit Ataatsimiititaliaq tamatumunnga oqaaseqaatissaqanngillat.

Siullermeerutaasumik suliarinninnermi sulinnigiffeqarallarnissamut akuerineqarsinnaanermut sinniisussamik aggersaanermut aningaasartuutunik ilaasortap pineqartup matussusiinissaata, siunnersuummi § 2, imm. 4-p oqaasertalerneqarsimanera malillugu, piunasaqaatigineqarsinnaanera partiimit ataatsimit isumaliornartoqartinneqarpoq.

Aalajangersagaq inatsimmik atuuttumik ingerlatseqqiisoq aatsaat atorineqarsinnaavoq, pissutissaqavilluni najuussinnaannginneq tamatumunngaluunniit assersuunneqarsinnaasumik patsiseqarluni sulinnigiffeqarallarnissamut akuersissuteqarneq pineqanngippat – tassa pisuni sulinnigiffeqarallarnissap immikkorluinnaq ittumik aningaasarsiaqaataanngitsumik akuersissutigineqarnerani.

Ilisimaneqartutut sulinnigiffeqarallarnissamut akuersissuteqarnissamut sinniisussamik aggersaanermi aningaasartuutunik sulinnigiffeqartup matussusiinissaanik piunasaqaateqarsinnaanermut periarfissaq Siulittaasoqarfiup atornikuunngilaa.

Sulinnigiffeqarallarnissamut qinnuteqaammut tunngavilersuut akuerineqarsinnaasup killinganiittut nalilerneqarpat, aningaasartuutinullu matussusiinissamik piunasaqaatitalerlugu sulinnigiffeqarallarnissamut akuersissuteqarnerup saniatigut taamaallaat itigartissummik nalunaaruteqarnissaq qinigassatuaappat aatsaat aalajangersakkap taassuma atorineqartussaana ilimagisariaqarpoq. Partiip sinniisussamik aggersaanissaq piunasarippagu aalajangersakkap aamma atorineqarsinnaanera isumaliutigineqarsinnaavoq, aggersaneq pippat naak sinniisussap sulinnigiffeqarallarnissamik qinnuteqartoq ulluni ikitsunnguani taamaallaat sinniisuuffgisussaagaa naallu tamanna aningaasartuutunik annertuunik nassataqartussaagaluartoq.

Suleriaatsimut Ataatsimiititaliaq akissuteqaammini ima allappoq:

*Aningaasarsiaqartitsineq pillugu inatsimmi atuuttumi 2003-meersumi § 2, imm. 2, oqaaseqatigiit kingullit, ima oqaasertaqarput:*  
*”Immikkut ittumik pisuni sinniisussamik aggersaanermut atatillugu aningaasartuutit akilerneqarnissaat sulinnigiffeqarallarnermik akuersinissamut tunngavissanngortinneqarsinnaavoq.”*

*Aningaasarsiaqartitsinermulli inatsimmut 2003-meersumut nassuiaatini aalajangersakkamut suut tunngaviunersut sukumiinerusumik nassuiaatigineqanngillat. Taamaasilluni aalajangersakkap siunertaa ersernerlussinnaavoq, naatsorsuutigineqarsinnaallunili pinaveersaartitsinissaq aalajangersakkakut siunertarineqarsimasoq, taamatullu aamma erseqqilluni immikkut aalajangersagaq pineqartoq aatsaat pisuni immikkorluinnaq ittuni, malittarisassanik atornerluinertut taaneqarsinnaasuni, atorneqartartussaasoq.*

*Taamatut immikkorluinnaq pisoqarsinnaananut assersuutitut eqqarsaatigineqarsinnaavoq ilaasortaq ataatsimiinnermi ulloq kingulleq sulinnigiffeqarnissaminik qinnuteqarpat sinniisussap avinngarusimasumi najugallip ataatsimiigiaqquneqarnissaa siunertaralugu, taamaaliornikkut partiip ilaasortap ilaasortaaffigisaata inatsisartut ataatsimiinnerata kinguninngua ataatsimeersuarnissaanut atatillugu ilaasortap angalaneranut ullormusiassaannullu aningaasartuutit sipaarsinnaaniassammagit. Assersuummi tassani aalajangersagaq, anguniakkamik naalakkersuinikkut suliaqarnermut tapiissuteqartarnej pillugu Inatsisartut inatsisaannut nr. 16-imut, 3. december 2009-meersumut tunngaviusumut ikorfartuisutut isigineqarsinnaavoq. Taamaalilluni inatsimmi taaneqartumi aalajangersarneqarpoq Namminersorlutik Oqartussat naalakkersuinikkut sulinermut naalakkersuinikkullu suliniaqatigiiffinnut toqqaannangitsumik aningaasatigulluunniit tapiissuteqarsinnaanngitsut, tamanna inatsimmi erseqqilluinnartumik tunngavissaqartinnagu.*

*Assersuutitut allatut eqqarsaatigineqarsinnaavoq Inatsisartunut ilaasortaq ataatsimiinnerup nalaani sulinnigiffeqarnissani siunertaralugu piffissami sivikinnerusumi sulinnigiffeqarniarluni qinnuteqarpat. Taamatut pisoqassagalarpat tamanna innuttaasunut kanngutsaatsuliornertut isigineqarsinnaavoq Nunatta Karsia sinniisussamik ataatsimiigiaqqusinermut immaqqa annertungaatsiartunik aningaasartuuteqarpat, naak sulinnigiffeqarnerup siunertaa Inatsisartut susassarinnikkaluaaraat.*

*Ataatsimiititaliap ilisimasai malillugit Inatsisartut Siulittaasoqarfiata aalajangersagaq taanna maannamut atorsimannngisaannarpa.*

*Siulittaasoqarfiup inatsisissatut siunnersuutaani siunnersuutigineqarpoq aalajangersagaq § 2, imm. 4, oqaaseqatigiinni kingullerni, ingerlateqqinneqassasoq. § 2, imm. 4-mi aalajangersagaq ima oqaasertaqarpoq:*

*”Inatsisartunut ilaasortaq pisuni immikkorluinnaq ittuni aningaasarsiaqaataanngitsumik sulinnigiffeqarnissamut akuerineqarpat, ilaasortaq aningaasarsiaqartitaassanngilaq aningaasartuutinulluunniit tapiissutinik pisartagaqassanani, taamatullu aamma sulinnigiffeqarallarnerup nalaani*

*soraarnerussutisiassanut ilaasortaajunnaarnersiutinulluunniit katersaqarsinnaanani. Aammattaaq sulinnigiffeqarallarnissamut akuersissuteqarnissamut sinniisussamik aggersaanermi aningaasartuutitik Inatsisartunut ilaasortap akiliuteqarnissaa piumasagaatigineqarsinnaavoq.*”

*Taamaalilluni aalajangersagaq taamaallaat atorineqarsinnaavoq pissutissaqarluni najuussinnaannginneq sulinnigiffeqarnerluunniit tamatumunnga sanilliunneqarsinnaasoq pineqartillugit, tassa pisuni immikkorluinnaq ittuni aningaasarsiaqaataannngitsumillu sulinnigiffeqartoqartillugu. Taamaalilluni erseqqippoq sulii pinaveersaartitsiniarluni immikkut aalajangersagaq pineqartoq, taamatullu aamma pisuni immikkorluinnaq ittuni aatsaat atorineqartartussaasoq, tassa isumaqarnarpat malittarisassat atornerlunniarneqartut imaluunniit sinniisussamik ataatsimiigiasaqusineq innuttaasunit isigagulu pissusissamisuumngitsutut tiguneqarsinnaassappat.*

*Aalajangersagaq maannamut sulii atorineqarsimannngimmat soorunami Suleriaatsimut Ataatsimiititaliamut nalileruminaappoq aalajangersagaq ingerlatiinnarneqartariaqarnersoq.*

*Aalajangersagaq maannamut sulii atorineqarsimannngimmat aalajangersakkallu siunertaa takorluukkersaarnertut pissuseqarmat Ataatsimiititaliaq isumaqarpoq aalajangersagaq ajornaquteqannngitsumik inatsisissatut siunnersuummit peerneqarsinnaasoq.*

Tamanna Inatsisunut Ataatsimiititaliamit tusaatissatut tiguneqarpoq, tamannalu naapertorlugu allannguutissatut siunnersuummik ataatsimiititaliaq saqqummiussivoq.

Inatsisunut Ataatsimiititaliap allannguutissatut siunnersuutaa tamatuma saniatigut inatsisissatut siunnersuummit inatsisissamik piareersaateqarnermi teknikikkut iluarsissutinik arlalinnik imaqarpoq.

## **2. Inatsisunut Ataatsimiititaliap inassuteqaataa**

Ataatsimiititaliaq isumaqatigiittoq allannguutissatut siunnersuummik saqqummiussivoq.

Inatsisunut Ataatsimiititaliap taamatut oqaaseqarluni siunnersuut aappassaaniigassanngortippaa.

---

Laura Tàunâjik,  
Siulittaasoq  
*Siumut*

---

Justus Hansen  
*Demokraatit*

---

Ineqi Kielsen  
*Siumut*

---

Aaja Chemnitz Larsen  
*Inuit Ataatigiit*

---

Iddimangiiu Bianco  
*Inuit Ataatigiit*